

3. Aita Intza'k ere irakurri dizkigu Napañoa-aldean idoro dituen euskal-itz berriak.

4. Azkue jaunak erderazko *modismo*-i dagokion euskal-esakerak deritzan lana irakurri du.

5. Kanpion jaunak esan digu: Datoñen Agofil'ean Axular zanaren jai-oroigarri batzuek Sara'n ospatzera dijoazela : On litzakela Euskaltzaindia jai oyetan izatea. Jai-egileak ez digute oraindik ezertxo ere adierazi, ta obe da noski gerorako ustea onen erabakia.

Ta beste gairik izan ez-ta, otoitzez amaitu da batzaraldia.

Bilbo'n Euskaltzaindiaren etxean, 1925'ko Epai- la'ren 26'an.

Azkue jauna maipuru dutela euskaltzain abek bildu dira : Urkijo, Landeñetxe, Olabide, Altube, Lakonbe ta Intzagarai. Urgazletatik Belaustegigoitia jauna. Maipuruak otoitza egin du.

1. Olabide jaunak dio : Bilbo'ko egunari *Euzkadi*'n galdetu duela, zergatik azaltzen ez diran, egunari onen orialdetan, Ebanjelioaren zatitxoak, ta erantzun diotela euskerazko zatitxo oiek ez dauzkatelako.

Euzkadi'k artu lezazkike, oraintxe agertu dan *Argi-donea* deitzen dan eliz-liburutik.

2. Maipuru jaunak irakurri du Agirñ Domingo euskaltzain maite zanaren anaiaren eskutitz bat, aren euskal-lanak, argitara bide, zertan ote dauden galde-
turik. Etxegarai jaunaren beste eskutitz bat ere irakurri da, auxe gai duelarik.

Erabaki da : Intzagarai jaunak bildu ditzala Agiré zanaren idazti lan berezi batzuek, ta abek argitaratzea, zerbait diru emanik, Agiré'ren senideari, jabetasunaren ordainbidez.

3. Bähr jaunari joan dan udaraldiko bere euskalanagatik zer sari eman lekioken autua jo da. Ikusten danez, bere eralketak 489,60 peseta izan dira. Euskaltzain batzuek diote, Bähr jaunak, eralketa ta bere lan ordain, 650 peseta artu lezazkikela ta geiago ez noski, Euskaltzaindiaren bekaduna dalako.

4. Altube jaunak oarbide luze ta mamitsu bat dakar, Azkue jaunaren *Morfologia*'ri zerbaitetan ere erantzuteko. Gogoz entzun dute euskaltzain jaun guziak, batez ere *acento*-ri dagokion zafi edera. Lan onek zer ikusi asko duelako Azkue'ren Morfologia-rekin gure aldizkari *Euskera*'n argitaratuko da.

5. Olabide jaunak, esku-idazti batetik artu-ta, Iruña aldeko erderari ezarita dabiltzan euskal-itz askoren zerenda irakuri digu.

Lan polit eta txalogaia da. *Revista Internacional* en argitaratuko da.

Ta beste gai batzuek bigaramonerako utzita otoi-tzez amaitu da batzaraldi au.

**Bilbo 'n, Euskaltzaindiaren etxean, 1925 'ko
Epaia 'ren 27 'an.**

Auruko batzaraldian aipatzen diran euskaltzain berak biltzen dira eta urgazletatik batez.